



ԽԱՂԱՂՈՒԹՅԱՆ ՔՐԻՍՏՈՆԵԱԿԱՆ ԿՈՆՖԵՐԱՆՍԻ ՄԻՋԱԶԳԱՅԻՆ ՍԵՄԻՆԱՐԸ ԲՈՒԴԱՊԵՇՏՈՒՄ

Սույն թվականի մայիսի 12—14-ը Բուդապեշտում տեղի ունեցավ Խաղաղության Քրիստոնեական Կոնֆերանսի միջազգային սեմինար՝ Հունգարիայի Եկեղեցիների Էկումենիկ խորհրդի հրավերով:

Ներկա էին Սովետական Միության, սոցիալիստական երկրների, Եվրոպայի, ԱՄՆ-ի, Լատինական Ամերիկայի, Աֆրիկայի և Ասիայի 22 երկրներից 65 ներկայացուցիչներ, ինչպես նաև դիտորդներ Եկեղեցիների համաշխարհային խորհրդի, Եվրոպական Եկեղեցիների Կոնֆերանսի, Եվրոպայի Կաթոլիկների Բեռլինի Կոնֆերանսի և այլ Էկումենիկ կազմակերպությունների կողմից:

Հայ Եկեղեցու կողմից սեմինարի աշխատանքներին մասնակցում էր Գերագույն հոգևոր խորհրդի անդամ, Խաղաղության Քրիստոնեական Կոնֆերանսի Մերձավոր և Միջին Արևելքի հատուկ հանձնաժողովի նախագահ տիար Հովհաննես Թովուզյանը:

Բուդապեշտի Խաղաղության Քրիստոնեական Կոնֆերանսի միջազգային սեմինարի գլխավոր թեման էր՝ «Լարվածության թուլացում և վատահոլության ստեղծում. Եկեղեցիների և քրիստոնյաների պարտականությունները Մադրիդի կոնֆերանսի նախապատրաստման գործում»:

Լսվեցին երեք ընդարձակ զեկուցումներ՝ «Եկեղեցիների և քրիստոնյաների նպաստը

լարվածության թուլացման և վատահոլության ստեղծման գործում 70-ական թվականներին» (դոկտ., պրոֆ. Վ. Բրեդենդիկ, Արեւելյան Գերմանիա), «Արևմտյան Եվրոպայի քրիստոնյաները լարվածության թուլացման և զինաթափման օգտին» (դոկտ., պրոֆ. Վ. Է. Վերդունկ, Հոլանդիա) և «Միջազգային դրությունը Մադրիդի կոնֆերանսի նախօրեին» (դոկտ. Յանու Պետրան, Հունգարիա) թեմաներով:

Ձեկուցումների շուրջ ծավալվեց մտքերի փոխանակություն: Ելույթ ունեցողներն ընդգծում էին Հելսինկիի համաժողովի շարունակությունը հանդիսացող Մադրիդի կոնֆերանսի կարևորությունը՝ միջազգային լարվածության ներկա պայմաններում: Արտահայտելով համայն աշխարհի քրիստոնյաների և բարի կամքի տեր մարդկանց խաղաղասիրական ձգտումները, Բուդապեշտի սեմինարի մասնակիցները կոչ արեցին Եկեղեցիներին՝ պաշտպանել և զորավիգ հանդիսանալ այն բոլոր միջոցառումներին, որ կարող են տանել դեպի լարվածության թուլացում, զինաթափում:

Սեմինարի եռօրյա աշխատանքների արդյունքներն ամփոփվեցին «Հայտարարության» մեջ, որը պետք է ներկայացվի Մադրիդի կոնֆերանսին՝ Խաղաղության Քրիստոնեական Կոնֆերանսի պատվիրակության կողմից:

